

欽定剿平三省邪匪方略

欽定剿平三省邪匪方略正編卷三十八

丁巳年

五月十五日

甲寅

秦承恩奏言

臣

前因採玉窑地

方有賊匪竄入滋擾當卽分派兵勇馳往各要

隘防堵一面會同富爾賽帶兵迎剿嗣該匪果

來湯峪口一帶探路適

臣

所派弁兵先行趕到

賊不敢窺伺藍田遂卽折回東竄由黑虎廟山

梁竄至鎮安縣之舊縣關放火焚掠因孝義川

已有淮備又值恒瑞大兵趕到卽向南竄入午
峪溝恒瑞等帶兵堵住溝口現與惠齡慶成等
合力兜剿惟據興安府知府周世紹稟稱有賊
匪二千餘人內多騎馬之賊由鎮安縣翻山竄
出洵陽之兩河關已至安康縣松樹壩屯紮距
府城九十餘里該府會同西安協領伊克精阿
督率滿漢官兵及義勇人等在漢江南岸排列

鎗礮悉力固守提臣柯藩延榆綏道溫承惠聞
信亦帶領兵勇由洵陽之趙家灣前來追剿前
路並無重兵恐賊匪因不能偷渡漢江卽由北
岸直趨漢陰石泉徑竄西鄉爲會合川匪之計
殊爲可慮查宜綿前調撤拉爾回兵二千名先

經

臣

札令由鞏昌畧陽捷路逕赴漢中聽調現

又飛札漢興道文需催令趲行卽令文需會同

該領兵官由漢中迎赴西鄉一帶堵剿不令闌

入川省邊界臣與富爾賽連日派撥員弁帶領

兵勇分赴賊匪竄逸各山溝內搜洗廓清後路

卽帶兵前赴興安分途剿辦再查雒南縣之石

板溝商州之商雒鎮藍田縣之韓家坪等處遺

孽經臣督飭員弁俱已剿洗淨盡奏入

上命軍機大臣傳諭惠齡恒瑞興肇慶成秦承恩曰

採玉竊賊匪經恒瑞等堵住與肅齡慶成等合力
兜剿自己不能北竄惟安康縣之松樹壩地方有
賊匪二千餘人由鎮安洵陽竄往屯割此股又係
何處賊匪或係姚之富等分夥之賊或又係本處
新起教匪何未奏明興安在漢江之南江面廣闊
且有文武各員督率兵勇在南岸排列鎗礮悉力
固守而柯藩亦由洵陽迎頭截剿則賊匪自不能

偷渡漢江竄入西鄉此時三股賊首歸併一處俱
往南竄而惠齡恒瑞慶成又俱會合夾剿宜綿所
調撒拉爾回兵現經秦承恩催令徑由漢中迎赴
西鄉適與昨旨相合於剿捕更資得力惠齡等務
須倍加愧勉悉心布置奮力合擊毋再遷延現在
秦嶺口一帶已無賊匪興肇自當帶兵與惠齡等
會合剿賊再柯藩由興安前赴洵陽當賊匪用竄

正可與賊相值迎頭截剿何以秦承恩轉稱柯藩
由洵陽之趙家灣前來追剿又似在賊匪之後自
係聲敘不明着遇便覆奏至秦承恩於堵剿賊匪
事宜辦理尙爲妥協惟該撫自初三日奏報後已
逾旬日朕朝夕懸盼至今始有此奏殊屬遲緩又
尙未獲賊首着傳旨申飭此後務當隨時速奏不
可仍前延緩

同日秦承恩又奏言據布政使倭什布詳稱部撥陝省軍需銀兩除轉解川省四十萬兩外供支節次官兵俸賞行裝代辦四川太平糧臺撫卹難民雇募鄉勇等費所存無幾現在湖北太兵全入陝境又奉調各路官兵軍火糧餉夫騾價脚及挑補新兵製備軍械並續辦撫卹各事宜需用甚繁應請

旨撥銀二百萬兩來陝以資接濟奏入

勅下部臣速議具奏

同日戶部奏言查陝境分竄賊匪現經官兵會合夾擊並續辦撫綏事宜需費較多今據秦承恩奏稱軍需項下所存無幾自應預籌儲備以資需用應請卽於部庫內撥銀二百萬兩令直隸山西陝西各該督撫遴委妥員分起管解接

替前進惟此次部撥銀兩到陝尙需時日或恐
緩不濟急前次撥解四川軍需銀兩曾經臣部

議將山西省本年徵存地丁項下儘數撥解川
省應用此項餉銀必由陝省經過倘陝省需銀
孔亟或卽將山西解款路過陝西時先行截留
二三十萬應用俟部撥銀兩解到後再行照數
撥還川省庶可期應手無悞奏入得

旨依議速行

十六日

乙卯

汪新奏言

臣

前赴鄖西沿途留心察

看自郡城北至火車嶺中間百餘里賊氛未及

麥隴連雲農民栽蒔新秧氣象甚爲恬謐自火

車嶺直至鄖西縣治三十餘里及東西北各境

均經賊擾民居焚掠之處較多四鄉麥田正熟

前此賊被官兵追急北竄未及搶割而居民奔

避他適亟須及早招徠乘時收穫

臣

當卽差員

分赴附近各處傳諭速歸復業旬日以來難民

扶攜老幼回籍者十之八九約計麥收尙得七

分惟廬舍多被焚燬棲身無所

臣

卽派員先將

附近縣治各難民按戶編查酌給錢米並房屋

修費以資安撫其四鄉各村派令同知蕭興孫

周季堂等分投查照一體先行給卹俟查明

口冊報到日再給三月正賑又查鄖西縣西北之上津堡正北之黃泥舖與陝省鎮安山陽等縣接界疊據探報賊匪合夥現在該二縣境內奔

竄業經官兵連營兜裹

臣

恐賊匪或仍南竄鄖

境隨卽派令鄉勇一千二百六十餘名交前委駐守上津堡之副將多爾濟扎普併同原帶兵三百名協力防守又派鄉勇五百名交守備陳

之壯併同原帶兵四百名前赴黃泥鋪防守遏
絕賊匪南竄之路以期大兵合圍掩擊又查鄖
陽府屬六邑惟鄖縣鄖西在漢水之北處處山
深箐密最易藏奸此時賊氛未遠臣恐尙有餘

匪潛匿密飭搜查隨據鄖令葉治試用州同陳
德基都司郭廷樞知縣秦錫疇府訓導唐承中
等稟獲賊夥奸細多名訊係賊營差探信息及

從賊劫搶之犯均經分別斬梟示衆

臣

復風聞

縣屬之石梯子卡首有誣殺良民之事因卽密

委布政司經歷銜朱謨前赴該處立將卡首許

信等四名拏獲到縣訊係挾嫌讐殺屬實

臣

以

鄉勇逞兇擅殺漸不可長必須盡法嚴辦以昭

懲創當卽擬子懸誅並刊示徧諭各卡嚴切申

儆又查鄖西縣治被賊蹂躪該邑文武有守土

之責如果臨時畏葸逃避必應按律嚴辦

臣於

途次接見義首紳耆卽向詢問僉稱賊匪先由

鄖西縣界牌垭入道河等處竄入該境署令秦

錫疇帶勇擊退詎另股賊匪忽由老虎坡五里

坪等處滋擾千總王得勝典史李殿英教諭嚴

大倫分往五里坪等處截擊該令秦錫疇馳赴

老虎坡截擊賊衆洶湧抗拒王得勝矛傷左膀

李殿英石傷左足嚴大倫落馬墮崖當經鄉勇
搶護得生維時賊匪業已闌入縣治該令秦錫
疇被賊阻絕不能赴救當卽趕赴東西豐江岸
隨同知府王正常堵截賊匪搶渡要路卽經擊
退等情臣隨抵縣治親勘詳查該邑本無城垣
又復兵守空虛此番賊氛自陝猝至該文武各
帶鄉勇堵守卡隘不虞賊衆分途竄擾詢係實

在確情可否邀免治罪之處出自

聖恩至鄖西縣治四面環山東西貼近兩山登高俯

瞰虛實易窺又無別可移建之處自應酌建城

垣以資捍衛上年宜綿帶兵至邑卽經議請建

築磚城臣思山僻小邑擬建磚城未免過於繁

費將來似應酌築土城並於城外東西兩山各

建石堡一座遇事派兵分紮拱衛縣城日可瞭

望四遠較於設守有益^臣將一切辦有端緒仍

回住郡城督辦協濟陝省軍營糧餉要務其沿

途各要隘應行添兵防守之處查前調之原任

提臣劉君輔帶兵一千名卽日已可到郡^臣俟

其到後卽與鎮臣馬瑀面爲商定分帶此項兵

丁酌看何處緊要卽赴何處巡防

同日惠齡恒瑞慶成舒亮奏言^臣等連日差探

賊蹤不敢竄往洵陽一帶復由山內逃赴鎮安

縣境_臣等沿途查訪鎮安一帶習教尤多上年

經秦承恩出示勸諭雖已具結改悔今賊匪經

過地方仍有愍不畏死相率入夥者此等烏合

匪徒日積日多必須趕緊剿除_臣等督率馬步

官兵間道抄襲以期迎頭截擊五月初三日行

至鎮安縣之東馬路坪地方接得阿爾薩朗初

一日來信據稱帶兵在表帶鋪紮營堵截探得
北來一股賊人直奔鎮安縣城隨即帶兵往截
殺死騎馬賊人數十名餘賊敗回等語旋據巴
克坦布報稱現有賊匪由西北王家坪等處竄
來離鐵場鋪二十餘里之鐵桶溝屯聚查西北
竄匪係恒瑞等所遺第三股之賊除一面飛
差弁兵前往查探外臣等當卽公同商酌北股

賊匪既經恒瑞等由採玉窰等處追逼南來若

將南股之賊剿逼北竄使其合夥各路併力圍

剿似可得手

臣

惠齡舒亮隨卽帶兵由西南進

逼

臣

慶成德光由東南前進中途俘獲賊夥張

大明等五人訊知王廷選李全等約會姚之富

等欲在黃龍舖過節後仍卽分竄如能過江再

圖合會

臣

等於初四日晚趕至鐵場舖與巴克

坦布訥音相晤深知南來賊匪已離黃龍舖十

餘里北來之賊已至紀家河隨即通知恒瑞等

於次日黎明一齊進攻

臣

惠齡巴克坦布舒亮

等督率弁兵由鐵場舖東山梁前進

臣

慶成訥

音德光帶兵由南山溝前進

臣

恒瑞等接准知會

督兵由西北野豬坪一帶前進並令德光帶兵由

東坡繞上副將觀祥關聯陞帶兵由西坡繞上

臣

惠齡由中路進攻

臣

慶成訥音帶領侍衛馬兵繞

至東西山後以便壓擊

臣

舒亮巴克坦布由左

右山坡接應僅空北面以便剿逼姚之富等竄

歸一處

臣

惠齡慶成等甫至黃龍鋪山口賊匪

數千公然排列山梁溝旁深箐均有伏賊一見

官兵卽由山上放鎗滾石分股直下我兵奮勇

爭先刀砍矛戳登時斃死數百人賊衆不能抵

攔退上山腰突有騎馬賊匪二三百人前來接
應敗賊又復聚集一擁齊來攪殺一處

臣

慶成

等密從捷徑繞上山頂下壓賊匪猝不及防被
鎗中箭滾巖落澗者不可勝計官兵踴躍喊殺
見有騎馬執旗賊目數人往來指揮抵死抗拒

臣

慶成等帶領巴圖魯侍衛哲克默新都司岳

寧阿等直衝賊隊健銳營前鋒校吉祥保那明

阿藍翎守備利振紀行營千總戴興朝四人首先殺死騎馬二賊生擒二名該四員趕入賊中又殺死十數人身受重傷俱各陣亡官兵目覩情形切齒憤恨奮勇衝殺賊匪拋棄器械驟馬向北山亂竄時臣恒瑞碩雲保富成等已自西北追趕賊匪前來兩股賊匪會合復恃人衆分投抗拒我兵二路夾攻併力截殺直至夜半賊

衆力不能支始行四竄山高路狹昏夜未便窮追是以暫行紮住此次殺賊三千餘名割獲首級九百餘顆奪獲馬騾牛驢五百餘匹鐵礮二位鳥鎗刀矛五百八十餘件生擒活賊三百二十三名內有舊賊頭目陳子明訊據供稱係李全徒弟陳兆五係王廷詔徒弟鄧榮茂係姚之富徒弟各掌一旗三股原祇四五千入自到陝

省以來陸續入夥及裹來者現共二萬有餘聞
得李全等商量想要逃過漢江再圖他往又據
新入賊夥之戴邦盛等俱稱都是陝省人素來
習教各有徒弟三四百人因王廷詔等到來邀
約各帶徒弟入夥每逢打仗總令新來者在前
王廷詔等立在高山見勢先走實在要往何處
未曾聽見餘無要供一併分別凌遲梟示所獲

器械給各營應用馬騾牛驢分賞出力兵勇查
明受傷陣亡官兵分別咨部此次官兵奮力剿
殺惟三逆首未得一人_臣等不勝忿懣現在探
得賊匪復分兩股東股賊數較少西股稍多臣
恒瑞等當卽督兵向東追殺_臣惠齡慶成等督

兵往擊西股竄賊再查北面商州藍田等處有
與肇泰承恩富爾賽督兵堵剿柯藩艾如文已

自達州帶兵馳赴興安堵剿

臣

惠齡已飛咨該

提督等時刻查探賊蹤嚴防偷渡惟劉君輔馬

瑀尙未得其已抵何處之信

臣

惠齡現復札催

倘賊匪竄入鄖陽更易剿捕但地方遼濶賊匪

畏懼官兵馬隊多從陡仄難行山路奔逃現聞

甘肅調來撒拉爾老教回勇慣行山路以之追

截賊匪必能得力

臣

惠齡已札知秦承恩速令

前來軍營以期分路設法加緊兜剿正在繕奏
間據查探之前鋒校祥保回稱阿爾薩朗於五
月初一日聞西北有賊竄來距鎮安縣城漸近
帶兵前往截剿途次午峪溝地方遇騎馬賊匪
二百餘人隨即督兵迎擊殲斃數十名餘賊奔
竄追殺二十餘里距表帶舖稍遠遂於王家坪
地方紮營不意賊衆暗由山溝前來乘官兵紮

營未定一齊撲犯阿爾薩朗督率官兵竭力抵禦殺死多賊因胸受鎗傷墜馬被賊戕害前鋒叅領七格副叅領保衡長青前鋒校阿克惇等帶兵殺人向前救護先後俱中傷陣亡防守黃龍舖之湖北宜昌府通判候補同知高舉伊子高垚鄉勇頭目九品職銜李國良帶領鄉勇前來接應同時被害前鋒叅領七十一副叅領觀

山等帶兵隨後趕到殺退賊匪該員等亦受重
傷現在飭醫調治臣恒瑞由該處經過詳查情
形均屬相符將陣亡受傷官兵查明咨部外所
有阿爾薩朗帶領官兵現已歸併碩雲保管領
均奏入

上命軍機大臣傳諭惠齡恒瑞慶成秦承恩汪新柯
藩日早間汪新奏招撫鄖西難民並籌辦堵禦搜

捕各情形所辦尙妥閱之稍慰旋遞到惠齡奏報
祇係兜截賊匪情形仍未獲一賊首雖據稱在黃
龍舖山口打仗殺賊三千餘名但賊匪數有二萬
感斃尙不及十分之二惠齡等帶兵堵剿已閱多
日仍未能迎頭攔截痛殲賊匪擒獲首逆所辦何
事又據奏阿爾薩朗於王家坪紮營未定賊衆暗
由山溝前來攻撲阿爾薩朗帶兵抵禦受傷墜馬

被賊戕害阿爾薩朗所帶之兵俱係健銳營勁旅
何至賊匪乘紮營未定之時猝來攻撲致領兵大
員破其戕害看來賊匪預在山溝潛伏其騎馬之
賊竟係來誘我兵而阿爾薩朗未能覺察惠齡又
未派兵策應以致墮賊奸計隨同帶兵之叅領七
格等向前救護亦何至俱中傷陣亡前此阿爾薩
朗共帶健銳營兵若干此次傷亡官兵究有若干

現存若干交與碩雲保管領摺內俱未聲敘明晰
至所稱前鋒叅領七十一副叅領觀山等帶兵趕
到殺退賊匪之語亦未可信阿爾薩朗被賊戕害
其隨同帶兵之七人亦俱不能抵禦同時被戕何
以七十一等二人帶兵到彼轉能殺退賊匪且伊
等亦俱受有重傷或竟係賊匪將官兵戕害後自
行散去未必係七十一等退殺該處賊匪既經退

散自必歸於大股賊夥惠齡等正當迎繞截剿何
以又在賊後尾追而此股賊匪卽係恒瑞等由西
北追來之賊必有姚之富在內何以賊在表帶鋪
王家坪與阿爾薩朗等相持彼時恒瑞等又在何
處不卽救援至阿爾薩朗陣亡後始由彼經過種
種情節朕必須悉其底細著惠齡恒瑞等詳晰查
明據實速奏毋稍含混阿爾薩朗著各部從優議

卹其同時被害之叅領七格等七人及在黃龍鋪
殺賊陣亡之前鋒校吉祥保等四人一併咨部優
卹看現在賊匪情形自皆向洵陽一路奔逸欲赴
興安此時雖分東西兩股而賊人詭計多端其東
竄之賊或祇係分遣黨與牽掣官兵而賊首等得
以乘間由西南一帶奔竄著惠齡確探賊蹤總當
以賊首所在之處併力迎前兜擊如東股賊匪或

有首逆在內恒瑞等自應跟蹤追捕若能將此一路賊首擒獲卽係恒瑞之功如此股內並無賊首則恒瑞仍當與惠齡等會合一路協力兜截不可又爲賊匪所愚以致兵分力單昨據秦承恩奏賊匪已由鎮安竄出洵陽之兩河關其意欲偷渡漢江經知府周世紹同協領伊克精阿帶領兵勇在南岸固守但該處並無大員恐尙不足倚恃惠齡

等當派鎮將大員前往協同防守至老教回民昨
據秦承恩奏令由鞏昌一帶前至漢陰石泉以遏
賊匪西竄漢中之路今惠齡奏又令速赴伊等一
路未免兩岐著惠齡等與秦承恩彼此酌定何處
緊要卽令其速赴該處不可彼此紛紛互調以致
無所適從再劉君輔馬瑀現據汪新奏欲留於鄭
西防守但現在陝省賊匪分竄惠齡等正在須兵

搜捕著汪新酌量情形如探聞賊匪有竄回鄖西
之信劉君輔馬瑀自當在該處防堵若鄖西並無
賊匪竄回卽應令伊二人帶兵前赴洵陽一路協
剿途中遇有竄回賊匪正可迎頭截剿又據汪新
奏查明鄖西知縣秦錫疇等前此猝遇賊匪滋擾
縣治尙無畏葸逃避情事自當均免治罪所有防
守地方及搜捕匪犯之文武員弁均著咨部議敘

同日

上諭內閣曰據景安查明豫省各屬鄧州等十五州縣境內村莊本年有賊匪滋擾之處又羅山等五縣亦間被蹂躪復業之後民情不無竭蹶其附近之伊陽等九州縣或各集義勇設卡防堵或挽運糧餉軍火等項差使較繁至南陽等二十三州縣路當孔道均有解運軍需送兵過境等事踴躍急

公所有新舊錢糧若卽照例催征民力未免拮据
百當分別施恩用示體卹著將前被賊擾之鄧州
唐縣新野桐柏淅川內鄉泌陽裕州葉縣南召舞
陽西平遂平確山信陽等十五州縣本年麥收後
應征新舊錢糧並嘉慶二年錢糧及羅山光山魯
山嵩縣盧氏等五縣本年應征新舊錢糧均加恩
展至戊午年麥收後分作三年帶征其原辦兵差

緩征之南陽鎮平鄧城臨潁襄城許州長葛洧川尉氏祥符蘭陽新鄭鄭州滎陽河內武陟考城獲嘉新鄉汲縣淇縣湯陰安陽等二十三州縣著加恩展至戊午年麥收後分作二年帶征至隣近堵禦應差之伊陽寶豐邾縣汝州宜陽永寧陝州靈寶閿鄉等九州縣本年應征新舊錢糧著緩至戊午年麥收後開征俾閭閻益臻寬裕該撫務須飭

屬妥辦以副朕軫念窮簷恩施體卹至意

十八日_{丁巳}宜綿明亮德楞泰奏言查賊匪分屯

重石子香爐坪二處其地固不若金栽寺之險

峻而四面亦係陡岸惟有綫路可上賊匪將路

逐節挖斷連設木卡四道以爲障蔽_臣明亮德

楞泰前經分路拏卡東南自田家山至黃馬村

土寺坪西南自富成寨至馬市口雖已逼近賊

巢山頂瞭望棚帳了然而深溝曲折環繞相距
尙有十餘里及七八里不等路徑處處可通賊

人屢思乘間逃竄

臣

宜綿等連日細察情形若

不嚴密防堵遽爾進剿不惟仰攻爲難兼恐賊

人情急四竄追擊更爲棘手因查黃馬村之前

有分水嶺一道土寺坪之前有火石嶺一道賊

人設卡甚多不可不先行搶佔

臣

德楞泰奎舒

明興於初二日率同巴圖魯侍衛墨爾津保鄂爾綏副將德寧等由黃馬村進攻分水嶺頭卡賊匪抵死抗拒官兵奮勇齊上卡內滾木插石紛下如雨千總冶正華把總馬德元外委尚進保張廷廼等首先躍入砍斃數賊賊人力不能支棄卡奔竄後卡之賊見前卡已失不敢抗拒官兵乘勝追擊連奪數卡殺賊二百餘名生擒

陳必倫等二十六名其治正華等四人均受傷
陣亡當將分水嶺一道盡行奪獲卽分派將弁
兵勇設卡駐守初三日臣明亮觀成率同總兵

朱射斗巴圖魯侍衛阿納保等爲一路臣德楞

泰奎舒明興率同總兵達音泰侍衛安慶等爲
一路分撲火石嶺同時並進左右夾擊賊人出
卡排立嶺上分投抵禦官兵進至山嶺之半賊

入施放鎗礮兼用木石擲擊我兵用擋牌抵住
吶喊爭先一擁而上刀砍鎗擊斃賊甚多守備
常萬青千總余海把總楊崑戴福皆身受重傷
陣亡屯都司根登太土守備格宗札什將執旗
頭人砍死一名生擒廖繼賢一名賊衆慌亂兩
路官兵合圍將火彈拋入卡內草棚火起賊人
自相踐踏及燒斃者不計其數生擒汪訓等十

五名餘賊竄歸巢穴。臣等一面督率將弁追擊

一面分派兵勇趕拏卡座自午至酉拏定十五

卡因時已薄暮尙有數卡未拏香爐坪重石子

賊匪於是夜亥刻傾巢而出分撲各卡幸溝壘

已挖築齊備官兵鎗礮齊施賊人連撲數次傷

斃無數後隊不敢前近西回賊寨提訊廖繼賢

供稱係徐添德大徒弟西營總領頭目當與陳

必倫汪訓等四十一名槩予駢誅初四日天明
督催將弁於緊要處所連拏九卡直達河邊與
東面東琳河副將王承勲南面羊烈子遊擊沈
宗文西南面羅江口副都統銜西津泰提督穆
克登阿營卡相接東南北三面已漸逼緊惟西
面自富成寨南至羅江口北至九密壩都司三
格營卡中間相隔二十餘里尙須設卡防堵又

由馬市口前進地名南子山尖山二處緊臨賊巢必須佔據拏卡使賊人無處躲避方可得手現在兵丁不敷分駐未便輕進

臣

英善續調梁

山等屬鄉勇甫據具報起程

臣

明亮德楞泰抵

川時因東鄉賊匪數萬巴州亦有賊匪屯聚大

寧縣屬九龍池等處復有蠢動之事兵力實不

敷用查苗疆尙有未經撤回粵兵四千餘名皆

係屢經打仗得勝之師如由永綏秀山來至川
省行走尙捷當卽札詢畢沅等撤出粵兵曾否
回省可否截留茲據畢沅等咨稱粵兵行抵辰
州適接臣等前札卽令取道由水路入川伏思
川省賊匪刻下情形與臣明亮德楞泰初到時
稍有不同但粵兵旣已入川未便令其轉回現
在重石子香爐坪尙有賊匪二萬餘人巴州大

寧之賊均未殲除且商鄖一帶竄匪未淨

臣宜

綿已於隨來陝甘官兵內撥一千五百名交柯

藩艾如文先帶回陝是川省多添一兵卽多一

兵之益現在粵兵尙無到營信息除飛催趕到

聽調一俟到時卽將羅江口至瓦窑壩一帶佈

置嚴密併力攻剿奏入

上命軍機大臣傳諭宜綿明亮德楞泰曰此次宜綿

等督兵奪佔山梁痛殲賊匪實爲出力可嘉現在
東南北三面均已拏卡緊逼賊巢籌畫尤爲得宜
宜綿明亮德楞泰著各賞玉喜字牌大小荷包觀
成奎舒朱射斗達音泰著各賞大小荷包其因剿
賊受傷陣亡之守備常萬青千總冶正華余海把
總馬德元楊崑戴福外委高進保張廷迺俱著咨
部加一等議卹又據奏川省此刻情形與明亮等

初到時稍有不同湖南苗疆撤回粵兵旣已入川
未便令其轉回等語此不過宜綿等因前調粵兵
時未經奏聞故爲回護其詞此項粵兵旣入川境
又何必令其轉回況多一兵卽可多得一兵之益
宜綿等業經飛催前進計此時早可到營而英善
所調梁山等屬鄉勇更當早到該處賊匪已經官
兵四面兜圍又添此項生力兵勇無難一鼓殲擒

宜綿等益當奮勉成功也

十九日

戊午

秦承恩奏言

臣

前接興安府周世紹

稟報有賊匪二千餘人由鎮安竄至安康縣之

松樹壩屯聚

臣

與富爾賽帶兵馳往堵剿茲行

抵鎮安縣之槐樹坪據署漢陰廳通判熊恢宇

報稱賊匪已於初七日竄至安康漢陰交界之

青泥灣查漢陰至西鄉僅隔石泉一縣相去甚

近該匪聞撒拉爾回兵已抵漢中諒不敢窺伺
郡城或由西鄉南路而至太平或由西南小路
斜趨通江巴州與方山坪等處賊匪會合均未
可定此時撒拉爾回兵如已趕赴西鄉正可迎
頭截剿杜其西竄倘回兵未到之先賊匪已入
川境臣宜綿接到該通判就近稟報自己預爲
籌備且聞宜綿等添調兩廣兵四千名於五月

初六七等日已抵東鄉尙在賊匪未經入川之前自可分力堵禦惟接准惠齡等札知初五日在鎮安縣東黃龍舖與賊打仗痛加剿殺賊復分爲二股東西逃竄惠齡慶成等追剿西股之賊恒瑞等追剿東股之賊查黃龍舖西竄之賊聞已由蔡家坪向大任河一帶逃竄卽前股賊匪竄入安康松樹壩之路必係暗相約會前赴

川境柯藩艾如文於五月初四日自洵陽馳往
趙家灣堵禦雖前去之賊已過興安而後竄之
賊正可遏其去路惠齡慶成等又緊隨追捕自
可兩面合擊至恒瑞等東追之賊聞已竄至大
新川該處南通鄖西東通山陽西通洵陽現在
尙無一定去向臣前因惠齡等正在圍剿黃龍
舖等處賊匪是以擬與富爾賽帶兵前往興安

堵剿今黃龍舖賊匪分股奔竄其往西者已有

惠齡慶成追擊

臣

卽不便拘泥接踵而西且恐

該匪等詭詐多端故意牽制官兵或因惠齡等

剿殺緊急另由捷徑翻山折回或東去之賊由

洵陽向兩河關等處西竄一經恒瑞等扼住來

路又仍由山陽竄赴商州孝義鎮安距西安商

州興安各祇三百六十里爲四路適中之地

臣

與富爾賽仍暫駐鎮安槐樹坪要路俟探明賊
由何路逸去卽由何處截殺至柯藩等所帶兵
力甚單臣現分出莊浪土司兵三百名延綏等
營兵七百名交署延綏鎮總兵田有成帶領速
赴趙家灣興安一帶幫同防堵自更得力

同日恒瑞奏言臣欽奉

諭旨因前次奏摺情節不符著令明白回奏臣於前

據恒瑞奏第三股賊匪奔向東南逃竄因前途有
鄖西鄉勇堵截賊復向西逃逸是此股賊匪亦思
西竄與前二股賊匪合而爲一正可聚而殲擒此
無論前有漢江間阻卽或因上游江面稍窄賊人
竟有偷逸宜綿現在達州應早得漢陰廳稟報預
爲籌備況湖南撤回廣東兵四千名此時早經到
彼該處帶兵大員甚多宜綿諒已派員帶兵由太

平西鄉而來惠齡等亦帶兵渡江彼此夾攻賊將
何往至賊匪前欲偷渡漢江經知府周世紹等悉
力固守前據秦承恩奏到時已諭令惠齡酌派鎮
將大員前往幫同防堵此時自己派往其周世紹
等當賊匪竄至江邊時果係伊等堵禦不使過渡
或竟能殲擒首夥著秦承恩查明具奏候朕加恩
示獎再達州重石子等處賊巢經官兵層層圍逼

宜綿等一經竣事卽酌分官兵十分之三前赴大
寧幫剿其餘大隊官兵迅赴西鄉漢陰一帶迎頭
剿賊更可迅速成功也

二十日 已未汪新奏言 臣前奉

諭旨以襄陽地方緊要令卽回襄督率防堵彼時劉
君輔帶兵方抵漢陽尙未來鄭而鄭西甫經收
復賊氛未遠人心未安是以留駐旬日將招撫

難民派防要隘搜捕奸匪各事次第查辦茲劉

君輔於初十日帶兵抵鄖馬瑀巡查邊隘道過

郡城與臣會晤適接駐守上津堡員弁具稟賊

匪竄至秋糧川歐家川等處焚搶均與上津相

近現在劉君輔帶兵馳赴上津迎頭截殺馬瑀

帶兵馳赴竹山竹谿遏其潛竄入蜀之路卽日

分投前往臣以上津堡在鄖西縣西北黃泥鋪

在鄖西縣正北均係接近陝省山陽鎮安且爲
由陝入鄖要路前經各派兵勇分駐嚴防此時
賊匪竄近上津該處尤關緊要先已飛飭派駐
鄖西縣治之同知周季堂將原帶鍾祥健勇八
百名移赴上津駐守茲得劉君輔前赴督率益
加嚴密至惠齡等各營所需糧餉軍火先因陝
省倉猝未集卽經安設臺站趕運供支近聞陝

省業已委員接辦臣思賊蹤飄忽無常大兵環

合圍剿正當萬分緊要之時應需一切軍儲寧

可量爲運貯以便隨時接濟且劉君輔馬珣所

帶各兵及上津堡黃泥舖原派兵勇均須按給

糧餉是以原設腰站總臺未便據撤已飭在郎

總理糧務知府張璿隨宜酌運總須寬備無患

臣卽日起程回駐襄陽總辦地方要件

同日柯藩奏言竊

臣

率同延榆綏道溫承惠自

興安起身順道先抵洵陽次及白河據兩縣面

稟卽西竄來賊匪三千餘人現在洵陽白河連

界之胡坪紮營大肆焚掠

臣

察看民情甚形惶

恐卽令溫承惠安慰撫綏並於兩縣各安兵二

百名撥本地鄉勇六百名固守城垣民心始得

稍安適鎮臣艾如文前來

臣

面與商酌因鎮安

屬之毛坪一帶現有賊匪滋擾洵陽所管之仙
河口蜀河等處係通毛坪要隘倘賊匪潛出撲
搶縣治密邇興安所關非細查臣所帶兵一千

三百七十餘名除撥安兩縣四百名外尙有兵
九百七十餘名臣等復回洵陽一而於仙河口

蜀河各撥兵一百名牛心石撥兵二百名並各
撥鄉勇二百名令其實力把守仍一面飛札府

縣將沿江上下大小船隻飭令盡數撤歸南岸

以防賊人過渡臣等安置停妥正在帶兵往截

間初二日戌刻據興安府周世紹報稱有賊匪

一股從山陽奔竄兩河關查由兩河關至趙家

灣係直往興安大路臣等於初四日起至趙家

灣賊匪聞官兵追截已於初二日從兩河關翻

山越嶺直奔興安臣等確詢路徑由洵陽之蘭

草坪一帶可以遶至前途但查趙家灣尙有由
老樹嘴直往興安之路誠恐賊人又由彼竄往

臣一面飛札溫承惠帶鄉勇四百名迅往堵禦

臣卽帶兵由蘭草坪趕緊迎截初五日申刻抵

黑虎嶺望見烟焰四起知有賊匪在彼焚掠相

距尙有二十里當將臣所帶之兵五百數十名

內先分二百五十名令艾茹文帶領由黑虎嶺

山澗蹊荒徑抄往松樹壩截剿臣亦卽由此

嶺山路前往夾擊見賊匪有百數十人正在焚

燒我兵吶喊齊進賊匪分兩股迎敵我兵奮力

剿殺刀砍矛刺殺賊七十餘名生擒趙金等九

名訊據供稱師傅張漢潮留我等一百餘人沿

路放火焚掠其餘三千多人已由松樹壩趕往

興安撲搶府城查興安並無多兵防守臣連夜

翻山行走於初六日早趕至興安據避難民人
咸稱賊匪知有官兵追截於初五日晌午已由
興安之柳林遶道直奔恒口地方滋擾查恒口
係通漢中大道尙有赴紫陽小路又有至興安
大路漢陰迤西廳縣兵守空虛誠恐賊人西竄
漢中或由恒口南山竄奔漢江潛行偷渡赴川人
夥抑或折回興安均未可定

臣

當將防守各隘之

兵派撥三百名交艾如文帶領馳往沿江一帶
堵截其各堤尙有兵二百七十名並在新城防
守兵內撥出兵八十名共湊兵三百五十名派
遊擊阿克東阿星馳帶赴漢陰堵禦以遏賊匪
西竄之勢今接艾如文來札果見賊匪在流水
店紮筏偷渡當經該鎮用鎗礮轟擊斃賊十餘
名帶傷落水者二十餘人賊匪始行退去艾如

文亦卽在江岸紮營堵截旋據報有從鎮安屬之紫溪河竄來一股賊匪越過磨溝地方焚燒搶掠又據報鎮安東毛坪竄來第二股賊匪三千餘人已至洵陽之聞家溝紮營距蜀河口五十里距兩河關一百餘里臣應卽帶兵前往截殺但存剩之兵祇二百數十名現在各堤防守所有宜綿調撥之寧夏西寧兵一千名因商

川緊急先經截留甘肅兵一千名業經停止其

撒拉爾回兵二千名臣屢次行催據帶領之員

稟報兩奉陸有仁札諭令其暫停循化尙未起

身緩不濟急臣實不能分身追剿惟有將興安

郡城設法防守竭力保護飛咨惠齡秦承恩迅

速撥兵趕來興安以便臣與艾如文分領截剿

可期藏事均奏入

上命軍機大臣傳諭宜綿重齡恒瑞興肇慶成秦承
恩柯藩曰汪新奏稱賊匪竄至上津堡之秋糧川
等處劉君輔等帶兵前往截殺等語昨據恒瑞奏
所追東竄之賊經鄖西兵勇堵剿復折回西竄汪
新等所奏情形自卽係恒瑞奏聞之事此時賊旣
西竄離上津堡已遠劉君輔等自當仍行留心防
範倘賊匪因恒瑞帶兵兜剿復又竄回正可痛加

殲戮如該處已無賊匪則劉君輔馬瑀仍當前赴
興安一帶幫同惠齡等剿辦不必在鄖西無賊之
處株守又據柯藩奏訊據賊匪供稱賊人欲由松
樹壩赴興安撲搶府城柯藩一面令艾如文由黑
虎嶺抄往截剿柯藩卽連夜趕至興安防護郡城
相隔一江賊匪紮筏偷渡業經艾如文在流水店
用鎗礮擊退但上游一帶江面窄狹恐賊於水淺

處所潛行偷渡不可不嚴爲防堵賊匪狡詐多端其所稱遶赴郡城等供安知非奸黨詐散謠言以爲牽掣官兵之計若如此處處隄防東西跋涉不但兵力分而見單亦且疲於奔走柯藩等總須擇要迎剿方爲得力又據稱所調撒拉爾回兵二千名陸有仁令其暫停循化尙未起身此項回兵前據秦承恩奏檄令由鞏昌一帶前來漢中興安迎

剿正資其力想帶兵之員接到檄催自己兼程行走趕赴漢興但朕前降諭旨原因甘肅地方緊要陸有仁冒昧調兵未免張皇是以加之訓飭令其回甘駐劄至此次乃宜綿所調陸有仁何得一律拘泥以致遲悞軍行實屬大錯陸有仁着交部嚴加議處仍傳旨嚴行申飭並着秦承恩將陸有仁因何停緩回兵之處嚴行叅奏仍就近飛催帶領

之員加緊行走迅至漢興一帶迎截賊匪勿再遲延再此時賊匪尙在漢江以北逃竄而興安郡城係在漢江之南何以柯藩轉往郡城防守與賊相隔一江該提督現帶兵力較單既不能趕剿前股之賊而後兩股之賊接踵而至柯藩或恐前後受敵是以暫往郡城駐劄但秦承恩昨奏已撥兵一千名前往協助柯藩等得此兵力更可遏賊西竄

想秦承恩處與柯藩相距較近延綏等營及莊浪
土司兵刻下早抵該處柯藩豈可尙在郡城逗遛
耶賊匪西竄遠去大約距惠齡慶成等已有兩三
日路程是賊匪行走一日之路惠齡慶成竟須行
走兩日使賊得乘間遠颺看來柯藩已不免在賊
匪之後而惠齡慶成更在柯藩之後如此遲緩所
辦何事惠齡慶成等先着嚴行申飭如惠齡自揣

精力不能加緊過行慶成年正富强亦應令該提督帶領壯健兵丁兼程趕往前途與柯藩等會合迎剿不可彼此觀望惟事尾追此時賊匪所在前有漢江阻隔又有官兵堵剿正可逼緊追捕痛加剿殺若惠齡不能趕上前股西竄恒口之賊亦當將後股賊匪痛剿擒渠若二者皆不得力使賊得於上游窄淺之處偷渡竄往巴州東鄉則宜綿明

亮自早得漢陰一帶地方官稟報必預派兵巡剿
以遏其歸併川匪去路而惠齡恒瑞興肇慶成帶
兵自北下壓兩面夾攻亦可得手與其使賊於陝
境未經蹂躪地方焚掠無寧逼令歸併達州以期
合力兜圍此係不得已中之好機會各帶兵大臣
等勉之